

COVID-19: Satu kematian, 95 pulih dan 40 kes baharu
Astro Awani
27 April 2020

PUTRAJAYA : Malaysia mencatatkan pertambahan satu lagi kes kematian melibatkan COVID-19 setakat jam 12 tengah hari, hari ini.

Ketua Pengarah Kesihatan, Datuk Dr Noor Hisham Abdullah berkata ia menjadikan jumlah kumulatif kes kematian COVID-19 di negara ini sebanyak 99 kes atau 1.7 peratus.

"Kes kematian ke-99 (kes ke-4087) merupakan lelaki warganegara Malaysia berumur 78 tahun dan mempunyai latar belakang penyakit kencing manis, darah tinggi dan strok.

"Beliau telah dirawat di Hospital Enche' Besar Hajjah Khalsom, Johor pada 7 April 2020 dan disahkan meninggal dunia pada 27 April 2020 jam 4.31 pagi," katanya dalam sidang media di sini pada Isnin.

Selain itu, 95 kes dilaporkan telah pulih dan dibenarkan keluar hospital hari ini.

"Ini menjadikan jumlah kumulatif kes yang telah pulih sepenuhnya dari COVID-19 dan telah discaj daripada wad adalah sebanyak 3,957 kes (67.9 peratus daripada jumlah keseluruhan kes). Sekali lagi, bilangan kes yang didiscaj hari ini adalah lebih dua kali ganda bilangan kes baru yang dilaporkan," tambahnya.

Pada masa sama, terdapat 40 kes baharu yang dilaporkan dan menjadikan jumlah kes positif COVID-19 di Malaysia adalah sebanyak 5,820 kes.

"Oleh itu, jumlah kes aktif dengan kebolejangkitan COVID-19 adalah 1,764 kes. Mereka telah diasingkan dan diberi rawatan," ujar beliau.

Sehingga kini, seramai 37 kes positif COVID-19 sedang dirawat di Unit Rawatan Rapi (ICU).

Daripada jumlah tersebut, 17 kes memerlukan bantuan pernafasan.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-satu-kematian-95-pulih-dan-40-kes-baharu-240410>